

ЎЗБЕКИСТОН РЕСПУБЛИКАСИ  
ОЛИЙ ВА ЎРТА МАХСУС ТАЪЛИМ ВАЗИРЛИГИ

---

ФАРҒОНА ДАВЛАТ УНИВЕРСИТЕТИ

**FarDU.  
ILMIY  
XABARLAR-**

1995 йилдан нашр этилади  
Йилда 6 марта чиқади

1-2019

**НАУЧНЫЙ  
ВЕСТНИК.  
ФерГУ**

Издаётся с 1995 года  
Выходит 6 раз в год

<b>А.Рафиқов, А.Сотволдиев</b> Параболо - гиперболик тенглама учун нолокал шартли масала.....	5
<b>И.Неъматов, С.Кукиева</b> Предикатлар ва кванторлар ёрдамида теоремаларни тузиш .....	11
<b>М.Азизов, С.Рустамова</b> Бернулли тенгламасига келтириб ечиладиган биринчи тартибли оддий дифференциал тенглама учун Коши масаласи.....	13

КИМЁ

<b>А.Ибрагимов, Ю. Исақов, О.Йигиталиева, А.Иброҳимов</b> Ўзбекистонда ишлаб чиқариладиган мева шарбатлари ҳамда меваларнинг анализини ўтказиш услубиёти.....	17
<b>Ю.Исаев, С.Рустамов, И.Асқаров, Н.Тўлаков</b> Глициррининг кислотасининг таркибида мочевина бўлган ҳосилаларини синтез қилиш .....	21

БИОЛОГИЯ, ҚИШЛОҚ ХЎЖАЛИГИ

<b>Р.Максудов</b> “Балиқчилик инновацион маркази” фаолияти ва балиқчиликнинг истиқболлари.....	24
---	----

ГЕОГРАФИЯ, ТУПРОҚШУНОСЛИК

<b>И.Зокиров, С.Исроилжонов</b> Ҳашаротларнинг ўсимликка таъсир кучини аниқлаш мезонлари .....	27
---	----

Ижтимоий-гуманитар фанлар

ИҚТИСОДИЁТ

<b>Н.Рахмонов</b> Таълим хизматлари сифатини бошқаришнинг назарий асослари .....	31
<b>М.Мўйдинов</b> Агросаноат мажмуасида кичик ва ўрта бизнес кластерларини шакллантириш принциплари.....	35

ТАРИХ

<b>Б. Усмонов</b> XV асрнинг 70-йилларида Фарғона .....	39
<b>Н.Режаббоев</b> Наманган уездига “овқатланиш пункт”ларининг фаолияти .....	43
<b>А.Нурматов</b> XX асрнинг 80-йилларида енгил ва озиқ-овқат саноати моддий-техника базасининг айрим ҳолатлари хусусида (Фарғона водийси мисолида).....	49
<b>М.Мансуров</b> Фарғона водийсида қишлоқ туризмнинг ривожланиш жараёнлари ва имкониятлари .....	55
<b>Х.Юнусова, У.Усаров</b> Фарғона водийси деҳқончилик маданияти ва аъналарини ҳақида баъзи мулоҳазалар.....	58

ФАЛСАФА, СИЁСАТ

<b>Т.Абдуллаев</b> Инсон эҳтиёжларининг шаклланиш хусусиятлари .....	62
---	----

## XV АСРНИНГ 70-ЙИЛЛАРИДА ФАРҒОНА

Б. Усмонов

**Аннотация**

Мақолада XV асрнинг 70-йилларида Фарғонада юз берган воқеалар Мовароуннаҳр ва Мўғулистондаги сиёсий жараёнлар билан боғлиқ ҳолда кечганлиги ёзма манбалар асосида таҳлил этилган.

**Аннотация**

В статье на основе письменных источников проанализированы события, произошедшие в 70-х годах XV века в Фергане, в тесной связи с политическими процессами в Мавераннахре и Моголистане.

**Annotation**

The article studies the written historical sources of the process of events which took place in Fergana in the 70s of the century and these events were developed in close connection with the political process in Maverannahr and Mogolistan.

**Таянч сўз ва иборалар:** Юнусхон, Умаршайх мирзо, Султон Аҳмад мирзо, Фарғона, Мовароуннаҳр, Мўғулистон, Аҳси, Андижон, Тошкент, Сайрам, Шоҳруҳия, вилоят, вассал, черик.

**Ключевые слова и выражения:** Юнусхан, Умаршейх мирза, Султан Ахмад мирза, Фергана, Мавераннахр, Моголистан, Ахси, Андижан, Ташкент, Сайрам, Шахрухия, вилайет, вассал, черик.

**Key words and expressions:** Yunus Khan, Umar Sheikh Mirza, Sultan Ahmad Mirza, Fergana, Maverannahr, Mogolistan, Ahsi, Andijan, Tashkent, Sairam, Shahruxia, Vilayat, vassal, army.

Умаршайх Мирзо ҳукмронлиги даврида Фарғона водийсидаги сиёсий воқеалар Мовароуннаҳр ва унга қўшни бўлган Мўғулистондаги вазиятга бевосита боғлиқ ҳолда кечди. Бу вақтда Самарқанд ва Бухоро шаҳарлари Султон Аҳмад мирзо, Ҳисор ва Бадахшон Султон Маҳмуд мирзо, Фарғона водийси Умаршайх мирзо, Тошкент, Сайрам, Шоҳруҳия шаҳарлари эса амир Шайх Жамол қўли остида бўлиб, уларнинг бирортаси яққол устунликка эга эмас эди. Самарқанд ҳукмдори Султон Аҳмад мирзо укаси Умаршайх мирзони ўзининг вассали сифатида билар, Умаршайх мирзо эса ўзини мустақил ҳукмдор деб ҳисоблар, унда ҳатто Самарқанд тахтини эгаллаш орзуси ҳам йўқ эмасди. Бу эса кўп ўтмай улар ўртасида ўзаро курашнинг бошланишига олиб келди. “Чун Умаршайх мирзо, - деб ёзади Бобур мирзо, - баланд ҳимматлик ва улуғ доиялик подшоҳ эрди. Ҳамиша мулкғирлик дағдағаси бор эрди, неча навбат Самарқанд устига черик тортди, баъзи маҳал шикаст топти, баъзи маҳал бемурод ёнди” [1,9].

Дарҳақиқат, Бобур мирзо таъкидлаганидек, Умаршайх мирзонинг Самарқандни забт этиш мақсадидаги юришлари ҳеч қандай натижа бермаган. Умаршайх мирзонинг ўз мулкани доимий равишда кенгайтириб боришга уринганлигини тарихчи Хондамир ҳам таъкидлайди: “Ва Мирзо Умаршайх Кўрагон жаннатмакон отасининг тириклик айёми ниҳоясига етгач, ҳиммати юксаклиги орқасида Андижон вилояти тушумига қаноат қилмасдан, доимо юрт олишлик ўй-фикрида Султон Аҳмад мирзонинг мамлакатига қўл чўзиб, низо эшикларини очиб юрди. Худди шу каби баъзида Мўғулистон томонга қўшин тортар ва ул

диёр аҳолисининг тинч турмушига халақит бериб, зиён-заҳмат етказарди. Шу жиҳатдан ул ҳазрат билан Юнусхон ўртасида нифоқ чанги кўтарилар ва қаршилиқ, душманлик алангаси мўғулларнинг ички ўчоғига ўт ташларди. Аммо шунга қарамай, бир неча бор Юнусхон ота-болалик сабаби ҳуқуқи мулоҳазасига кўра Мирзо Умаршайх Кўрагонни ўз олдига чақирди ва инсонийлик расмини тутиб, бир неча жойни ул ҳазратнинг меросий мулкига қўшиб берди. Аммо Умаршайх мирзонинг муддаоси бундан ҳам ортиқроқ бўлгани учун бу янглиғ инъом ва бахшиш тўғрисида уруш ва қон тўкишлик олови сўниш сифатини топмади” [2,25].

Хондамир берган маълумотлар бошқа манбалардан бирмунча фарқ қилади. Масалан, Умаршайх мирзо Мўғулистон ҳудудига қўшин тортиб борганлиги, Юнусхоннинг унга мулклар инъом этганлиги ҳақидаги маълумотлар бошқа тарихий манбаларда учрамайди. Юнусхон ва Умаршайх мирзо ўртасидаги ягона жанг ҳам Фарғона водийсида бўлиб ўтади, бу ҳақда куйида кенгроқ тўхталамиз. Юнусхон эмас, аксинча Умаршайх мирзо Султон Аҳмад мирзо ҳужумларидан ҳимояланишда ёрдам олиш мақсадида Юнусхонга Фарғона водийсидан бир неча бор мулклар инъом этганлиги маълум. Шунинг учун ҳам Хондамир маълумотларининг мазкур қисмларига қўшилиб бўлмайди.

Лекин Хондамир келтирган ушбу маълумотларнинг пайдо бўлиши ҳақида мулоҳаза юритиш фойдадан холи эмас. Албатта, Хондамир Умаршайх мирзонинг Мўғулистонга борганлиги ҳақида бизга маълум бўлмаган маълумотларга эга бўлган бўлиши мумкин. Шу ўринда Мирзо Ҳайдарнинг қуйидаги хабари

Б. Усмонов – ФарДУ Ўзбекистон тарихи кафедраси доценти.

этиборимизни жалб этади: “Умаршайх мирзо бир неча марта Мўғулистонга бориб, у ерда бир-икки ойлаб қолган. Баъзан у хонни Андижонга чорлар, хон ҳам бир-икки ойлаб Умаршайх мирзо хонадонидида турган” [3,120-121; 4,158]. Демак, Умаршайх мирзо бир неча марта Мўғулистонга борган. Гарчи Мирзо Ҳайдар бирор бир санани келтирмаса-да, Умаршайх мирзо меҳмон сифатида Мўғулистонга бир неча марта борганлигини қайд этган. Бу ҳолатда Мирзо Ҳайдар бу ташрифларни меҳмон сифатида бориш, Хондамир эса сиёсий-ҳарбий юриш сифатида баҳолаган бўлиб чиқади. Бизнинг фикримизча, Хондамирнинг юқорида таҳлил этилган фикри муболағалидир. Агарда Умаршайх мирзо Мўғулистонни забт этиш ёки талон-торож қилиш мақсадида юриш қилганида, бу юриш бошқа тарихий манбаларда ҳам маълум даражада акс этган бўлар эди. Бундан ташқари, Шайх Жамол вафотидан кейин Мовароуннаҳрда вужудга келган сиёсий вазият Фарғона ҳукмдорининг Мўғулистонга юриш қилишига имкон бермасди.

Ўзаро низолар аслида Тошкент ҳокими Шайх Жамолнинг машҳур мўғул амири Каримберди дуғлатнинг жияни амир Абдулқундус томонидан ўлдирилиши билан бошланди. Расман Самарқанд ҳукмдори Султон Аҳмад мирзога бўйсунган, амалда эса Тошкент, Сайрам ва Шоҳруҳияни мустақил бошқарган Шайх Жамолнинг ўлдирилиши воқеаси, мирзо Ҳайдарнинг хабар беришича, ҳижрий 877 (милодий 1472-1473) йилда рўй берган [3,119; 4,157]. Шайх Жамолнинг қудратли амирлардан бири бўлганлигини, у Мўғулистон хони Юнусхонни бир йилга яқин муддат давомида асирликда сақланганлигидан ҳам билса бўлади. Шунга қарамай, кутилмаганда Шайх Жамолнинг мўғул амири Абдулқундус томонидан ўлдирилиши Юнусхоннинг озод бўлишига олиб келади. Мўғуллар Шайх Жамолга қаршли ҳудудларни забт этишга журъат қилишмайди ва Мўғулистонга қайтиб кетишди. Уларнинг ўз юртига қайтиб кетишларига қалмоқларнинг Мўғулистонни тарк этиши ҳам таъсир қилган эди [5,356].

Ҳуқуқий жиҳатдан Шайх Жамолнинг ҳукмдори бўлган Султон Аҳмад мирзо эса Тошкент, Сайрам ва Шоҳруҳияни ўз мулклари қаторига қўшиб олади. Ушбу воқеа натижасида Самарқанд ҳукмдорининг мавқеи кескин ошиб кетганлигини ҳисобга олган Юнусхон Султон Аҳмад мирзо билан яқин муносабатда бўлишни маъқул кўради. Қалмоқларнинг ҳужумлари туфайли Мўғулистонда мавқеи кучсизланиб қолган Юнусхон катта қизи Меҳр Нигор хонимни Султон Аҳмад мирзога турмушга бериш орқали у билан қариндошлик алоқаларини ўрнатиб, темурийлар билан муносабатларни

мустаҳкамлашга ҳаракат қилди. Юнусхоннинг мақсадини мирзо Ҳайдар қуйидагича баён қилади: “Юнусхон Бурунж ўғлонни ўлдиргач, катта қизи Меҳр Нигор хонимни Султон Абусаид мирзонинг ўғли Султон Аҳмад мирзога узатди. У илгари шундай деган: “Султон Абусаид мирзо мўғуллар билан темурийлар орасидаги душманликни дўстликка айлантирди, мен эса шу дўстликни қариндошликка айлантираман.” Султон Аҳмад мирзонинг умрини охиригача Меҳр Нигор хоним унинг ҳарамида қолди” [3, 120-121; 4, 158].

Юқорида айтганимиздек, Султон Аҳмад мирзо Тошкент, Сайрам ва Шоҳруҳияни тўлиқ ўзига бўйсундириб, бу ҳудудда ҳам ўз ҳокимиятини мустаҳкамлади. Бу эса Мовароуннаҳрда кучлар нисбатининг кескин ўзгаришига олиб келди. Аввал фақат Зарафшон ва Қашқадарё воҳалари устидан ҳукмронлик қилаётган Султон Аҳмад мирзонинг мулклари кенгайди ва Фарғона водийсига тўлиқ чегарадош бўлиб қолди. Натижада Умаршайх мирзо Мўғулистон ҳукмдори Юнусхон билан яқинлашишга мажбур бўлиб, бу яқинлашув ҳижрий 880 (милодий 1475-1476) йилда никоҳ билан мустаҳкамланди. “Шайх Жамол ўлдирилганидан кейин, - деб ёзади Мирзо Ҳайдар, - 880 (1475-1476) йилда Мўғулистонга келгач, Юнусхон иккинчи қизи Қутлуғ Нигор хонимни Султон Абусаид мирзонинг ўғли Умаршайх мирзога берди. Хон билан Умаршайх мирзо ўрталарида шундай самимият бўлганки, бунақаси ҳатто ота-ўғил ўртасида ҳам кам учрайди. Умаршайх мирзо бир неча марта Мўғулистонга бориб, у ерда бир-икки ойлаб қолган. Баъзан у хонни Андижонга чорлар, хон ҳам бир-икки ойлаб Умаршайх мирзо хонадонидида турган. Ўша кунлари Умаршайх мирзо хонни Самарқандга юриш қилиб, Самарқанд тахтини Султон Аҳмад мирзодан хоннинг катта куёвидан тортиб олишга ва Умаршайх мирзога беришга тинмай гижгижлаган. Лекин хон рози бўлмаган” [3, 120-121;4,158].

Бу никоҳдан Юнусхон ҳам ўзига хос мақсадларни кўзлаган эди. Хоннинг асл мақсади Султон Аҳмад мирзонинг Фарғона водийсини ҳам бўйсундириб олишига йўл қўймаслик бўлиб, Мовароуннаҳрнинг Султон Аҳмад мирзо қўли остида ягона давлатга бирлашиши Мўғулистон манфаатларига зид эди. Лекин шу билан биргаликда Умаршайх мирзонинг ўз мулкларини кенгайтириб, Самарқанд ва Бухорони бўйсундириб олиши ҳам унинг манфаатларига мос келмасди. Шунинг учун Юнусхон фақат Умаршайх мирзога Султон Аҳмад мирзога қарши мудофаа урушларида ёрдам берди. Умаршайх мирзо ўз акасининг ҳужумларидан сақланиш учун доимо Юнусхондан ёрдам олишга ҳаракат қилганлиги ва унга Фарғона водийсидан мулклар

## ТАРИХ

ажратиб берганлиги кўпгина муаллифлар томонидан таъкидланган [6, 26; 7,16-17].

Султон Аҳмад мирзо Юнусхон ва Умаршайх мирзони биргаликда юриш бошлашларига йўл қўймаслик мақсадида ўзи Фарғона водийси томон қўшин тортади. Лекин вазият урушгача етиб бормади. Юнусхоннинг шахсан ўзини катта лашкар билан Фарғона водийсига етиб келганини эшитган Самарқанд хукмдори юришни тўхтатиб, ўз ортига қайтиб кетади. Акасининг навбатдаги ҳужумидан хавфсираган Умаршайх мирзо Юнусхонни Фарғонада олиб қолиш мақсадида унга қишлаш учун Аҳси вилоятини инъом этади. Айнан шу воқеа кейинчалик Умаршайх мирзо ва Юнусхон ўртасида уруш бошланишига сабаб бўлади.

Юнусхон билан Умаршайх мирзо ўртасидаги келишмовчиликлар ҳақида Абдураззоқ Самарқандий аниқ воқеаларни баён қилмаса-да, шунга ишора қилиб ўтади. “Шаҳзода ул вилоятнинг, - деб ёзади муаррих, - Мўғулистон чегарасида бўлган қалъа-ю шаҳарларини шундай мустаҳкамладики, у вилоятга киришу чиқиш мажболи мўғул лашкарининг хотиридан ҳам кечмай қолди. Бир қанча вақтгача жаҳонпано подшоҳнинг давлат қуввати туфайли у мамлакатнинг райияти муҳолифлар зарар-заҳматидан эмин бўлиб, у вилоятнинг барча ерлари шаҳзода адолати кўмагида маъмур ва ободон бўлди. Юнусхон қанчалик ҳийлаю тадбир атрофида айланмасин, у вилоятга эга чиқолмади ва оқибат, ноумид бўлиб жўнаш жилувини Мўғулистон томон бўшатди” [7,639]. В.В. Бартольд Абдураззоқ Самарқандийнинг мазкур маълумотига таяниб, Юнусхон Фарғонани эгаллаб олишга ҳаракат қилганлигини, лекин унинг ҳаракатлари бесамар кетганлигини таъкидлайди [8,75]. Лекин бошқа тарихий манбаларда Юнусхоннинг Фарғона водийсига юриш қилганлиги хусусида маълумотлар йўқ. Бу ерда Абдураззоқ Самарқандий ўз вақтида водийнинг бир қатор мулкларини қишлаш учун Юнусхонга инъом этилиши, баҳор келиши билан эса унинг Мўғулистонга қайтиб кетишга мажбур бўлганлиги ҳақида сўз юритган бўлса керак.

Икки ўртада низонинг келиб чиқиш сабаблари тўғрисида Бобур мирзо ва Мирзо Ҳайдарларнинг фикрлари бир-бирига жуда яқин. Бобур мирзо: “Неча навбат қойин отаси Юнусхонниким, Чингизхоннинг иккинчи ўғли Чигатойхон наслидидур, Чигатойхоннинг юртида мўғул улусининг хони ул фурсатта ул эрдиким, менинг улуғ отам бўлғай, истидъо қилиб келтурди. Ҳар қатла келтурганда вилоятлар берур эрди. Чун Умаршайх мирзонинг мудаосидек бўлмас эрди, гоҳи Умаршайх мирзонинг бадмаошлиғидин, гоҳи мўғул улусининг муҳолафатидин вилоятга тура олмай

яна Мўғулистонга чиқар эрди,” деб ёзган эди [1,9]. Умаршайх мирзонинг хавф бартараф этилганидан сўнг мўғулларни бу ерда қолишини хоҳламаслиги тушунарли, албатта. Шунингдек, мўғул қабилалари ҳам қиш фаслини водийда ўтказишга мойил бўлса-да, ёз келиши билан ўз яйловларига қайтишни маъқул кўришарди. Айнан шу масалада ёшлиги Эроннинг шаҳару қишлоқларида ўтган Юнусхон билан мўғул қабила бошлиқлари ўртасида кўп бора келишмовчиликлар чиққанлиги маълум [3,119-120; 4,157].

Мирзо Ҳайдар эса “Тарихий Рашидий” асарида Юнусхон ва Умаршайх мирзо ўртасидаги низонинг келиб чиқиш сабабларини янада аниқроқ баён қилади: “Охири шундай бўлдики, хон ҳар қишда Андижонга келар, мўғул улуси Мўғулистонда қоларди. Хон эса ўзига яқин хизматкорлари билан Андижонга келарди. Умаршайх мирзо ўз вилоятларидан хонга маъқул бўлганини берарди. Баҳор келгач хон Мўғулистонга кетарди. Мирзо эса яна ўз вилоятини эгаси бўлиб қолаверарди. Бир гал Умаршайх мирзо акаси Султон Аҳмад мирзодан хавфсираб, Юнусхонни чорлаб унга Аҳсини берган. Хон Аҳсида қишлашга жазм қилган. Бу ҳақида хабар Султон Аҳмад мирзога етгач, у юришни бекор қилган. Умаршайх мирзо Султон Аҳмад мирзонинг ҳужум қилмаслигидан хотиржам бўлгач, хоннинг Аҳсида ўтириши унга алам қилган. Чунки Аҳси Фарғона вилоятидаги энг катта шаҳар бўлиб, шаҳарларнинг онаси ҳисобланарди. Шу сабабдан у Юнусхонга қарши кўзгалди ва Така Секретку деган жой кўприги яқинида жанг бўлди”, деб таъкидлаган эди [3,120-121; 4,159]. Фарғоналик амирларнинг водийнинг энг йирик шаҳарларидан бири ва катта қалъасининг мўғулларга берилишидан норози бўлишлари табиий эди. Умаршайх мирзо ҳам ўз давлати манфаатларидан келиб чиқиб фаолият олиб борган.

Шу ўринда айтиб ўтиш керакки, Юнусхон ҳар сафар ҳеч қандай жанг қилмасдан Фарғона водийсида мулкка эга бўлаверган. Чунки, унинг ёрдамга келганлигини эшитган Султон Аҳмад мирзо ҳам Умаршайх мирзо билан бирор марта жанг қилишга журъат этмаган. Умаршайх мирзонинг ҳужумга ўтишига эса Юнусхон йўл қўймаган. Бу ҳам маълум даражада Умаршайх мирзонинг ўз қайнотасидан норози бўлишига сабаб бўлган бўлиши мумкин.

Такасекретку жанги Умаршайх мирзонинг биринчи мустақил йирик жанги эди. Бобур мирзо ушбу жанг мазкур вилоятга алоҳида тарих бўлиб қолганлигини таъкидлаб, қуйидагиларни баён қилади: “Юнусхон била Андижоннинг шимол тарафида Сайхун дарёсининг ёқасида Такасекретку деган ерда, бу жиҳатдин ул мавзеъ бу исмға мавсумдурким, тоғ домонаси жиҳатидин

бу дарё андоғ тор оқарким, ривоят қилурларким, ул ердин така секригандур, мағлуб бўлиб иликка тушти. Яна Юнусхон яхшилик қилиб вилоятига рухсат берди” [1,10]. Ушбу жанг ҳақида муаррихлар Хондамир [2,25-26] ва Мирзо Ҳайдар [3,119-120; 4,157] ҳам деярли шундай маълумот қолдирганлар. Чиндан ҳам бу жангда Юнусхон тўла ғалаба қозонади ва Умаршайх мирзони асир олади. У нима учун Умаршайх мирзони озод қилиб ўз юртига қайтариб юборди, Фарғона водийсини ўз давлатига қўшиб олмади? Бунга бизнингча қуйидаги сабаблар таъсир қилган:

- кўчманчи мўғулларнинг Фарғона водийсида қолиши уларнинг аксарияти учун ҳам маъқул эмасди. Мўғул қабилалари учун Фарғона водийси талон-торож объекти сифатида мавжудлиги манфаатлироқ бўлган;

- Фарғона водийсининг мўғуллар қўлига ўтиши халқнинг қаттиқ қаршилигига олиб келар, водий шаҳар-қалъаларини узоқ қамал қилиш ёки штурм билан эгаллашга мўғул қўшинларининг тоқати йўқ эди;

- Фарғона водийсининг Мўғулистон ихтиёрига ўтиши Султон Аҳмад мирзо билан

муқаррар тўқнашувга олиб келарди. Юнусхон учун Султон Аҳмад мирзо ва ўзининг мулклари ўртасида Умаршайх мирзо давлатининг бўлиши энг хавфсиз вариант эди.

Хулоса сифатида шуни айтиш мумкинки, XV асрнинг 70-йиллари бошларида Мовароуннаҳрнинг шимоли-шарқий қисмида кучлар мувозанати кузатилди. Лекин Тошкент ҳокими Шайх Жамолнинг ўлдирилиши билан Самарқанд ҳукмдори Султон Аҳмад мирзо мавқеининг кучайиши Фарғона вилоятини қийин вазиятда қолдирди. Фарғона ҳукмдори Умаршайх мирзо эса Мўғулистон хони Юнусхон билан яқинлашиш орқали ўз мавқеини сақлаб қолишга интилди. Мўғул хонининг ўз манфаатлари йўлида Темурий мирзолар ўртасидаги низоларга аралашуви ўртадаги кучлар мувозанатини сақлаб турган бўлса ҳам, секин-аста ҳудудда Темурийлар таъсирининг пасайишига олиб келди. Бу билан XV асрнинг 80-йилларига келиб Тошкент, Сайрам ва Шоҳрухия шаҳарларининг мўғул хонлари қўлига ўтиб кетишига замин яратилди.

#### Адабиётлар:

1. Заҳириддин Муҳаммад Бобур. Бобурнома / Нашрга тайёрловчи П. Шамшиев. – Т.: Юлдузча, 1989.
2. Ғиёсиддин Бин Ҳумомиддин Хондамир. Буюклик хислати (“Башар аҳди сийратидан хабар берувчи дўст” китобининг Заҳириддин Муҳаммад Бобур ҳаёти ҳақидаги боблари) / Форс тилидан таржима, кириш ва изоҳлар муаллифи Исмоил Бекжонов. – Т.: Шарқ, 2011.
3. Мирзо Муҳаммад Ҳайдар. Тарих-и Рашиди // Введение, перевод с персидского А.Урунбаева, Р.П.Джалиловой, Л.М.Епифановой, примечания и указатели Р.П.Джалиловой и Л.М.Епифановой. – Т.: Фан, 1996.
4. Муҳаммад Ҳайдар Мирзо. Тарихи Рашидий // Сўз боши ва изоҳлар муаллифи ҳамда таржимонлар В. Раҳмонов ва Я. Эгамова. – Т.: Шарқ, 2010.
5. Аҳмедов Б. Темур ва Қамариддин // Аҳмедов Б. Амир Темурни ёд этиб. – Т.:Ўзбекистон, 1996.
6. Азимджонова С. К истории Ферганы второй половины XV в. – Т.: Изд-во АН, 1962.
7. Жалилов С. Бобур ҳақида ўйлар. –Т.: Шарқ, 2006.
8. Абдураззоқ Самарқандий. Матлаи саъдайн ва мажмаи баҳрайн / Форс тилидан таржима ва изоҳлар муаллифи, тарих фанлар доктори А.Ўринбоев. – Т.:Ўзбекистон, 2008.
9. Бартольд В.В. Очерк истории Семиречья. – Ф.: Киргизгосиздат, 1943.

(Тақризчи: М.Исомиддинов – тарих фанлари доктори, профессор)